

## DOMENIE XXXII «VIE PAL AN»

### Antifone di jentrade cf. Sal 87,3

Che e rivi, Signôr, denant de tô muse la mê preiere;  
slungje al gno lament la tô orele.

### Colete

Diu onipotent e bon di cûr,  
slontane di nô dut ce che nus fâs mâl  
par che, pronts cul cuarp e cu l'anime,  
o podìn servîti in plene libertât.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE 1 Re 17,10-16

La vedue e fasè cu la farine une pete e je puartà a Elie.

Dal prin libri dai Rês

In chei dîs, Elie si cjapà sù e al lè a Zarepte. Biel che al rivave te jentrade de citât, e jere aventi une vedue che e stave cjapant sù stecs; le interpelà e i disè: «Puartimi un sclip di aghe intun crep, che o ài di bevi». Cuan che e stave lant a cjolile, i vosà: «Puartimi ancje un bocon di pan inte tô man». Jê i rispuindè: «Pe vite dal Signôr, to Diu! No ài pan cuet; o ài si e no un pugn di farine tune pile e un got di vueli tun crep; o stoi cjapant sù doi stecs par dâ dongje alc par me e par gno fi: o magjarin e o murirîn». Ma Elie i disè: «No sta vê pôre; va e fâs ce che tu âs dit. Prime però preparimi une pete e puartime. Po tu 'nt fasarâs par te e par to fi: parcè che il Signôr, Diu di Israel, al dîs cussì: La pile di farine no si sbassarà e il crep dal vueli no si disvuedarà fintremai a la dì che il Signôr al mandarà la ploe su la face de tiere». Jê e lè e e fasè come che i veve dit Elie e a mangjarin jê, lui e so fi. La pile de farine no si sbassà e il crep dal vueli no si disvuedà seont la peraule che il Signôr al veve dite a mieç di Elie.

Peraule di Diu.

### SALM RESPONSORIÂL dal Salm 145

R. Furtunâts i puars tal spirt: il ream dai cîi al è lôr.

O ben:

R. Aleluia, aleluia, aleluia.

Il Signôr al manten la sô fedeltât par simpri.

Ur fâs justizie ai tibiâts,

ur dà il pan a di chei che a son afamâts.

Il Signôr i presonîrs al libere. R.

I vôi dai vuarps il Signôr al torne a vierzi,

il Signôr al torne a tirâ sù chei che a son par tiere,

il Signôr i vûl ben a la int juste,

il Signôr al vuarde la int foreste. R.

Al viôt dal vuarfin e de vedue,

impen che lis trainis dai triscj lis savolte.

Il Signôr al regnarà par simpri:

il to Diu, Sion, di ete in ete. R.

### SECONDE LETURE Eb 9,24-28

Crist si è ufiert une volte par dutis cul fin di parâ jù il pecjât di cetancj di lôr.

De letare ai Ebreus

Crist nol è jentrât tun santuari fat de man dal om, spieli di chel vêr, ma adiriture tal cîl, par presentâsi denant di Diu pal nestri ben, e no par ufrîsi se plui voltis, usance il prin predi che al jentre tal santuari ogni an cul sanc di chei altris. In chest câs, di fat, al varès scugnût patî plui voltis de creazion dal mont in ca. Cumò invezit al è comparît une volte sole, cuant che i timps a jerin al colm, par parâ jù il pecjât midiant dal so sacrifici. E come che al è destinât pai oms che a muerin une volte sole, e dopo al ven il judizi, cussì Crist, dopo di jessisi ufiert une volte par dutis cul fin di parâ jù il pecjât di cetancj di lôr, al tornarà a pandisi une seconde volte, cence nissun rimpin cul pecjât, a di chei che lu spietin, par salvâju.

Peraule di Diu.

### **CJANT AL VANZELI Mt 25,34**

**R.** Aleluia, aleluia.

Vignût ca, benedets di gno Pari, al dîs il Signôr,  
a cjapâ paronance dal ream prontât par vualtris  
di cuant che al è stât fat il mont.

**R.** Aleluia.

### **VANZELI Mc 12,38-44**

**Cheste biade vedue, te sô miserie, e à dât dut ce che e veve.**

Dal vanzeli seont Marc

In chê volte, Jesù biel insegnant al diseve a la int: «Vuardaitsi dai scrituriscj, che i tegnin une vore a lâ ator vistûts di fin e a jessi saludâts tes placis, a cjapâ lis primis sentis tes sinagoghis e a sentâsi tai prins puescj intai gustâs; a glotin lis cjasis des veduis e a fasin fente di preâ a lunc. A varan une condane plui tremende».

Sentât denant dal tesaur, Jesù al stave cjalant cemût che la int e butave i bêçs dentri dal tesaur. Ind jere tante int siore, che a butavin dentri une vore. Rivade però une puare vedue, e butà dentri dome dôs palancutis, che a àn il valôr di un cuadrant. Alore lui al clamà dongje di sè i siei dissepui e ur disè: «Us al dîs in veretât che cheste biade vedue e à butât dentri plui di ducj chei che a àn butâts bêçs intal tesaur. Di fat ducj a àn dât di ce che ur vanzave, ma jê, te sô miserie, e à butât dentri dut ce che e veve, dute la sô bocjade».

Peraule dal Signôr.

### **Su lis ufiertis**

Cjale di bon voli, Signôr, lis ufiertis che ti presentin  
par che, cuntune sante dispozizion,  
o podìn vê ce che o celebrin tal misteri de passion di to Fi.  
Par Crist nestri Signôr.

### **Antifone a la comunion Sal 22,1-2**

Il Signôr al è il gno pastôr: no mi manjarà nuie.  
Mi fâs polsâ là che i passons a sverdein,  
mi mene là che a son aghis frescjis.

### **O ben: cf. Lc 24,35**

I dissepui a ricognostrin Jesù, il Signôr, tal crevâ il pan.

### **Daspò de comunion**

Ti ringraciìn, Signôr,  
di vènus sostentâts cul to sant regâl  
e o prein il to boncûr

che il to Spirt al conservi in grazie e scletece  
chei che a àn ricevude la fuarce dal cîl.  
Par Crist nestri Signôr.